

## Myfyrdod Mis Gorffennaf 2011

*“... yn cadw ffurf allanol crefydd ond yn gwadu ei grym hi. Cadw draw oddi wrth y rhain.” (2 Timotheus 3: 5)*

Ceir yma dri rhybudd:

**GALL CREFYDD AR EI GORAU DDIRYWIO’N GYFLYM!** A chaniatáu mai un o lythyrau olaf y Testament Newydd yw hwn, syndod meddwl fod perygl dirywiad eisoes yn y golwg. A’r atgof am Bentecost yn fyw, ymddengys tuedd yn barod i syrthio’n ôl i grefydd is. Digwyddodd hyn drosodd a throsodd yn hanes yr Eglwys. Cofiwn, felly mae celfyddyd yw crefydd ar ei gorau, ac amod ei chadw yw gwyliadwriaeth barhaus ac ymgysegrïad cyson.

**HAWDD YW BODLONI AR GREFYDD SYDD WEDI DIRYWIO!** Y mae syrthio’n ôl i grefydd is yn beryglus am ei bod yn bosibl dygymod â hi. Yn wir, y mae’n bosibl dod mor fodlon nes colli’r gallu i ymateb i’r uchaf. Cofiwn, felly fod crefydd uchel sydd wedi dirywio yn fwy peryglus na chrefydd baganaidd. Heb wybod gwell mae honno.

**MAWR YW’R GALW AM GREFYDD RYMUS!** Grym yw gair mawr y Testament Newydd. Rhyddhad nerthoedd ysbrydol yw ei syniad am Gristnogaeth. Cofiwn, felly nad syniad i’w gofleidio yw Cariad Duw, ond gallu y mae’n rhaid ildio iddo. Ildio i gariad Duw yw grym crefydd. Rhith yw popeth arall!

### Gweddi:

Bywha di ein cydwybod, O Dduw, â’th sancteiddrwydd; portha ein meddwl â’th wirionedd; pura ein dychymyg â’th harddwch; agor ein calonnau i’th gariad, a phlyg ein hewyllys i’th bwrpas dwyfol. Amen.

*(Seiliedig ar weddi gan William Temple)*